



PLAID SIN VIA

Culs gis pli liungs e las empremas seras emperneivlas da stad daventa Laax puspè in liug special dallas sentupadas. Carstgauns s'entaupan sin nossas plazzas, ad occurrenzas ni ella natira magnifica – a moda spontana, cordiala e sur tuttas generaziuns. Igl ei exact quei spèrt che renda nies vitg schi vivs e vitals. Cul-la piazza avon la Nova Sentupada cree-scha la pleiv catolia in tal spazi. Profitei dalla caschun d'involver Vossa idea cun separticipar alla concorrenza per il concept da quella piazza. Denton era il «Spazi» porscha plaz per sentupadas ed activitads communablas. Quei baghetg public san ins reservar per occurrenzas da tut gener, el s'offerescha ad uniuns, grup-pas, famiglias e privats. Savens eis ei las caussas semplas che colligian ils carstgauns: ina spassegiada ella natira, ina pausa al lag ni in discuors sin ina terrassa sulegliva. Nossa cuntrada regala a nus biars tals muments, loghens da serecrear, trer flad ed esser ensemen. Metter a cor a Vus vuless jeu la radunonza generala extraordinaria da vendergis, ils 12 da zercladur 2026. El center ei la revisi-un totala dalla constituziun. Quella dat ca-schun da s'exprimer, parter opiniuns e da prender communablamein decisiuns impurtontas pigl avegnir da nossa vischnaunca. Ina vischnaunca vitala viva dalla participaziun. En quei senn giavischel jeu va tuts ina biala stad cun biars buns contacts cheu a Laax.

Franz Gschwend,
president communal



Scannei il code QR ed abboni il canal, e Vus retscheveis las informaziuns directamein dalla vischnaunca. Vossas coordinatas persunalas sco maletgs da profil e numras da telefon restan zuppadas. Per garantir l'actualitad dallas informaziuns vegnan tuttas contribuziuns e texts stizzai automaticamein suenter 30 gis.

IMPRESSUM:

Novas da Laax, vischnaunca da Laax
Cumpara: 4 x ad onn
Proxima ediziun: **28 d'uost 2026**
Ideas per tematicas: tochen ils 14 d'uost 2026
Redacziun: Domenica Flütsch

FORMAZIUN PLAZ SENTUPADA

Ideen gesucht - encuretgs ideas

Culla construcziun dalla Nova Sentupada dat ei il medem mument ina gronda piazza avon il baghetg. Quei niev liug da sentupada duei survegnir ina formaziun speciala – in mosaic da sulada. Il motiv leutier vegn encuretgs cun ina concorrenza d'ideas. Fagei part!



Visualizaziun entrada dalla Nova Sentupada.

Text: Franco Furger

La stad 2026 entscheivan las lavurs da construcziun dalla Nova Sentupada sut la baselgia parochiala da Laax. La casa d'oc-currenzas duei daventar in liug dallas sentupadas, dil brat e dall'inspiraziun. In liug nua che carstgauns da tuttas generaziuns s'entaupan, in liug che duei rinforzar la cuminonza dil vitg. Sils plans dil project dat la fuorma sturschida digl edificii en egl. La Nova Sentupada s'integrescha aschia, cun sia construcziun en lenn, optimalmein ella topografia dil crest-baselgia. Il medem mument s'extenda ina vasta piazza avon l'entrada dalla sala principala, e quella piazza envida quasi da s'entupar e sebrattar.

Lantschau ina concorrenza

La piazza ei ina part essenziala dil niev center da s'entupar. La muntada dil s'entupar e comunicar in cun l'auter duei esser veseivla el concept architectonic. In grond mosaic da crappa sulada duei vitalisar la piazza ed envidar da scuvrir, s'an-flar e sebrattar. La Nova Sentupada ei cheu per las habitontas ed ils habitonts da Laax. E quella populaziun ha lu era la pusseivla-dad da concepir quei mosaic da plant-schiu. Siu motiv resp. il sujet enquera la

pleiv catolica, sco patruna da baghegiar, cun ina concorrenza d'ideas. Tuts astgan separticipar : Giuven e vegl, hosps ed indigens, artistas ed artists da hobi sco artis-tas ed artists professionals. Impurtont eis ei da risguardar las directivas dalla con-currenza.

Premiaziun alla fiera dil vitg

Ils 30 da zercladur 20267 ei il davos termin d'inoltrar l'idea a scret. Ina giuria vegn a far ina preselecziun da treis tochen tschun motivs che vegnan presentai alla fiera dil vitg dils 26 da fenadur 2026. Leu sa la po-pulaziun votar e decider dil motiv victur. Plinavon ha la populaziun lu la pusseivla-dad da cumprar speciala crappa da sulada. Cheutras san ins sustener activamein e per-sunalmein il project communabel.

Vuleis Vus era separticipar al concept dalla piazza?

Tuttas informaziuns mira:
www.pleiv-laax-falera.ch



NOVITADS DALLA SUPRASTONZA COMMUNALA



Matiu Dermont ei vegnius elegius ils 11 d'avrel 2026 sco niev commember dalla suprapstunza communal. El vegn a surpender il departament scola, sanadad e sport. Il giuven advocat ei s'engaschaus gia pli baul en diversas incumbensas communalas e cumissions. Cun sia elecziun survegn la suprapstunza inavusch giuvna connectada ella regiun e cun interess per tematicas dalla societad e dalla politica da formaziun.



Isabelle Schliess fa part dapi igl 1. da fenadur 2025 dalla suprapstunza communal da Laax. Ella ei responsabla pil resort polizia, pum-piers, militer e schurmetg civil, sco era selvicultura e santeri. Isabelle Schliess ei naschida e carischida si a Turitg e viva dapi 2022 a Laax. Cun sia experientscha en economia e direcziun sa ella contribuir da maniera multifara per la lavur dil maun public. Ella s'engascha specialmein pils carstgauns da Laax, pil svilup persistent ed ina veta dil vitg activa.

Emprema badelada Centrala d'energia Prau Pulté

A Prau Pulté, gest sper Staderas, baghegia la proveditura Flims Electric AG ina nova centrala d'energia. Il stabiliment funcziuna cun stialas da lenn indigen e duei preveder el futur ils territoris Flem Casa d'Uaul e Laax Murschetg cun calira persistenta. Sistems moderns d'arcunar e da recuperar calira procuran ch'ins sa trer a néz efficientamein l'energia e duvra optimalmein las reservas da lenna. La calira producida vegn surdada alla Reit termica Laax SA che garrantescha il provediment en direcziun Laax Murschetg. Dacuort ei stada, en preschientscha dils presidents communal da Flem e Laax, l'emprema badelada dil project. Cun quel sanins remplazzar scaldaments fossils e reducir cheutras las emissiuns da CO2 ellas duas vischnauncas. Il medem mument rinforza il diever da resursas regiunalas la creaziun da valor locala e l'economia circulara.

LA FIASTA D'AFFONS LAAX ENQUERA VOLUNTARIS

La fin d'jamna dils 18 e 19 da fenadur 2026 ei puspei la fiasta d'affons. Pli che 40 attraccziuns envidan da far termagls e giugs, zambergiar, seschar surpender ed esser en

moviment. Per che quell'enconuscenta occurrenza da stad sappi funcziunar senza incaps, enquera il comite d'organisaziun gidontas e gidontas voluntaris engaschai.



Über 40 Attraktionen am Kinderfest.

Seigi per assister als affons, gidar en cuschina ni survegnar ils posts dils giugs – per mintga voluntari dat ei ina incumbensa adattada. Gl'engaschi entscheiva allas 8.15 al Lag Grond e sa cuzzar gest tenor giavisch in ni dus gis. Mintga voluntari survegn in bon per la consumaziun il gi ch'el ei en acciun. Plinavon vegn el/ella envidaus gl'uost alla party da gidontas cun ina tscheina ed in program da divertiment. La pli gronda paga resta denton il rir dils affons che han astgau passentar uras nunemblideivlas alla fiasta d'affons a Laax.

Uonn festivescha la fiasta d'affons il giubileum da 25 onns. Igl ei restau in occurrenza senza profit, ina fiasta che mintga affon astgan guder per in da tschun francs e separticipar per quella summa allas numerusas attraccziuns. Quei ei pusseivel suletamein cun in engaschi enorm da voluntaris e sustegn finanziel da sponsurs.

Tgi che vul daventar part da quella cuminonza da voluntaris e contribuir al success dalla fiasta d'affons Laax, sa s'annunziar tier voluntaris@kinderfest-laax.ch. E tgi che vul visitar l'occurrenza pli bugen sco hosp, astga era selegrar questa stad da novas attraccziuns e dus bials concerts per famiglias.

Dapli informaziuns: kinderfest-laax.ch, voluntaris@kinderfest-laax.ch

LAAX 2028 – NI TGEI VALAN 300 DUCATAS D'AUR OZ?

A Laax en mintga cass, ina historia da 600 onns libertad. Per festivar quei giubileum han la Fundaziun Pro Laax e la vischnaunca politica da Laax lantschau ensemen las preparativas per in teater el liber. Ch'ìls da Laax ein secumprai libers lezza gada dil cont da Werdenberg-Sargans duei vegnir commemorau. Nus lein far quei da cuminonza e rinforzar aschia il chit en vischnaunca. Il teater el liber che vegn scretts aposta e sin mesira per quella fiasta duei vegnir presentaus alla riva dil lag da Laax, e quei la stad 2028.

Laax mira anavos sin ina tradiziun da biars decennis cun teaters el liber. Nus me nein vinavon quella e prendein gl'exempel dil toc giubilar da 1978 «La glisch da la libertad» da Donat Cadruvi. Era 1988 (Romeo e Giulietta), 1998 (Anatevka) ed il davos il 2009 (In siemi dalla notg sogn Gion) han ils da Laax fatg teater sper il Lag Grond. Cun in toc niev e concepìus sin mesira vulein nus schar reviver puspei quella tradiziun speciala da nossa cultura.

In project communabel per l'entira populaziun

Cun integrar activamein indigens, secund-indigens sco era vischinas e vischins d'auters vitgs vul Laax mussar che la vischnaunca ei buca mo in bellezia liug da viver e far vacanzas, mobein ch'ina cuminonza aviarta, viva, creativa e vitala viva cheu. Nus vulein promover la cultura el vitg ed ella regiun ed envidein la populaziun da separticipar activamein al project. Tgi che ha gia coope-
rau ad ina producziun da teater sa co il spért da cuminonza crescha d'emprova ad emprova. Il pli bi ei che quei sentiment finescha buca suenter la derniera. La valur che talas producziuns scaffeschan per ina cuminonza, ei bia dapli che 300 ducatas d'aur.

In niev capetel per Laax

Sebasond sin questas ponderaziuns e bu-namein 20 onns suenter il davos teater el

liber vulein nus porscher alla populaziun ed alla regiun puspei in spitachel cultural. Las preparativas han gia entschiet. Il teater vegn realisau cun René Schnoz sco reschissur ed Esther Berther sco menadra dalla producziun. Paul Steinmann, ina corifea ella sparta da scriver tocs da teater, vegn a scaffir pil giubileum 600 onns Libers da Laax in toc concepìus aposta per Laax. Umberto Camathias e sia sora, Andrea Schmed-Camathias, surprendan la direcziun dil chor ad hoc. La musica da quei giug el liber cumpona Mario Pacchioli.

• Patrunadi:

Fundaziun Pro Laax / Vischnaunca Laax
Toni Camathias – camathias@prolaax.ch
Irina Beer-Killias – i.beer@laax-gr.ch

Comite d'organisaziun

Co-Presidi: Toni Camathias,
Irina Beer-Killias
Commembers: Maja Meyer, Sabrina Welter,
Ivan Brunold

ALP NAGENS TIER SRF BI DE LÜT – Z'ALP

L'Alp Nagens ei el center dalla sisavla staf-la dall'emissiun «SRF bi de Lüti – z'Alp». Duront la stad 2025 ha ina equipa dalla televisiun accumpignau las soras Désirée ed Elin Gschwend sin lur lavur da mintga-gi. Las aspectaturas ed ils aspectaturs survegnan ina envesta autentica ella veta e lavur ellas muntognas. Quei entscheiva naven dil menaschi d'alp baul la damaun, sur la producziun da caschiel tochen tier las sfidas d'ina stad alpestra. La registraziun impressiunonta muossa buca mo la culissa dils cuolms sur Laax e Flem, mobein muossa co la famiglia secolligia culla tradiziun alpina. La nova staf-la che vegn emessa dapi la fin da matg 2026 mintgamai il vendergis sera envida da surstar, guder e prender part a quei che schabegia allas duas protagonistas.

AGENDA

Vendergis, 5 da zercladur 2026

Excursiun geologica senda dil Dragun

Tura aventurusa tras gl'uaul, silla pli liunga senda da tschemas dil mund
Dall'8.00 tochen las 12.00. Liug da s'entupar: fermada digl'auto da posta Laax Murschetg

Vendergis, 5 da zercladur 2026

Café nocturn

Las localitads dil Museum da Laax cun siu ambient historic
envidan ad in sitg da buna notg.
Naven dall'18.00 tochen mesanotg,
Museum Laax

Gievgia, 11 da zercladur 2026

Viadi dils seniors ad Elm

La vischnaunca da Laax e l'Uniun da dunnas envidan all'excursiun d'in gi en Glaruna.
Allas 7.50, serimnar alla piazza dalla posta/parcadi dil lag

Vendergis, 12 da zercladur 2026

Radunonza communal extraordinaria

part. La revisiun totala dalla constituiun
Allas 19.00, aula Grava

Dumengia, 28 da zercladur 2026

Aertura exposiziun «Unser tägliches Brot» / «Nies paun da mintgadi»

S'annunziar tier info@museumlaax.ch
Allas 18.30, Museum Laax

4 – 5 da fenadur 2026

Nordstern Moving Mountain Festival

LAAX ed il Nordstern Club Basel

legendar colligian DJs exquisits, tuns electronics
ils pli fins culla culissa muntagnarda.
Dall'12.00 tochen las 22.00,
Galaaxy Crap Sogn Gion

Sonda, 25 da fenadur 2026

Marcau dil vitg

Fiera dil vitg varionta cun divertiment musical ed ustria
Dall'10.00 tochen las 17.00

31 da fenadur 2026

Concert al Lag Grond

1 d'uost 2026

Fiasta naziunala